

Von de Schnooke bis onns Leckbrett

So arsch oodächtisch bisde joo nit gewese, hott de Schorsch gesacht, alls ichem ver-zählt habb, was omm Sunndaach vorm Verlobte Daach, noochem Vermächtniskonzert vom Sängerbund, unne om Pestkreiz passiert ist. Unn zwar habb ich emm erzählt, dass während dem Gottesdienst om Pestkreiz enn Schwarm von Schnooke sich uff die Leit gesterzt hott, die doo uff de Kreuzung von de Hauptstrooß mett de Hochemer Strooß unn de Unnermoostrooß gestonne hawwe.

Dess war so schlimm, habb ich gesacht, dass vill Leit alls mett de Händ gefuchtelt unn aach monchmal mett de Hond uff de Arm odder so geklatscht hawwe, um die Viecher ze erwische. Zwaa Daach später habb ich geheert, dass e Fraa so verstoche worn iss, dass bein Dokter musst unn de Arm verbunne kriecht hott, so dick war der geschwolle.

Honnes, hott de Schorsch gemoont, dissmol konnt ich joo nit debeisoi, ich war uffem sibbzichesde Geburtsdaach oigelade, awwer su wie du dess hier erzählst, habb ich dess noch nit erlebt.

Aach de Karl konnt sich nit erinnern, dasses so was mett so vill Schnooke schunn jemols beim Verlobte Daach odder om Daach devor gewwe hott.

Awwer ich war noch nit ferdisch: Unn wissder was ich noch gemerkt habb? Es warn koo Schwalwe mehr om Himmel unn aach koo Mauerseechler mehr. Josses naa, wissder noch wie die alls gekrische hawwe? Sri, sri sinnse zwische de Heiser dorsch, sinn hochgeflooche unn widder erunner, immer so kloone Trüppcher, wie e groß Familie mett ihrne Nochbern, die nochemol kräfdisch Micke unn Schnooke fonge wollte, um sich noch fett ze mache ferr ihr Reis in de Süde. Unn die Schwalwe sinn, wenn schee Wedder war, hoch geflooche unn wens e bissi nooch Reeche ausgeseh hott, sinnse dene Leit om Pestkreiz grad so iwwer die Köpp geflooche. Awwer dissjohr? Koo Schwalb, koon Mauerseechler unn doodeferr vill Schnooke.

De Karl hott mettem Kopp gewackelt. Wissder, ich denk weils im April schunn su heiß war als wärs Summer, hawwe die Veechel sich all frieher widder abgemacht, die Brut war großgezooche, konnt flieche unn selwer Schnooke fonge, ess hott oft gereechent, was sollte die noch bei uns, also hawwese sich defoogemacht. Also ich habbs joo nie glaawe wolle, awwer longsom moon ich aach, dass sichs Klima verännert hott.

Was onnerst, hott de Schorsch gesacht, weil merrs grad vom Gottesdienst hadde. Ich bin gefroocht worn, warum ess in de Gallus-Kerch e „Leckbrett“ gibt unn wo der Nome herkimmt.

Ich habb enn Aachblick uffem Schlauch gestonne. Schorsch, habb ich gefroocht, merr solls nit ferr meechnlich halle, awwer saach merr emol wo in de Kerch e Leckbrett iss.

Ei Honnes, hott de Karl gerufe, du misst dess doch wisse. Merr sächt zum Quergong vom Südportal eniwwer zum Nordportal dess Leckbrett. Vorne iss nor e Kniebrett, hinne iss die zugeheerisch Sitzbonk, dezwisehe iss Platz genuch, dass noch enn Haufe Leit im Gong stehe kenne. Awwer warum dess grad Leckbrett heeßt, dess waaß ich nit.

Mir wusstes nit. Awwer dehoom habb ich noochgeguckt, unn dess oonziche, was ich gefunne habb, kennt die Sach erklärn: Leckbrett kimmt von Löckbrett. Löcken, dess iss „mit den Füßen ausschlagen“. Unn weil merr uff dem Kniebrett in dem Gong genuch Platz hott, mett de Fieß nooch hinne auszeschlaache, kennt der Nome dooher kumme. Odder nit?

Eiern Honnes